

Oké Take Away
Nos Special
Cuminda
Crioyo
565-3232



**PROME MINISTER
A SPLICA DI E
AVANSENAN DI
ARUBA RIBA E
EARLY WARNING
SYSTEM**

HULANDA NO POR SPLICA DICON MESTER UN RIJKSWET; SEMPER NAN TIN GRIP



ARUBA TA ANFITRION DI E CARTAGENA CONVENTION DIANAN 3 PA 5 DI OCTOBER 2023



CORIENTE A BAY NA PAPILON PASOBRA UN TRUCK A SLIP RANCA UN PALO DI LUS COMPLETO



PROGRAMA DI BENEFICIO PA EMPLEADO HOH SUN SHARES TA UN REALIDAD



WARDACOSTA TIN UN DIRECTOR SUPLENTE NOBO



Accidente entre tres auto na Savaneta a laga dos persona herida atras y un homber deteni



Savaneta - Diamars anochi rond di 11'or y mey polis di San Nicolas ta bay cu urgencia mas pabou di

Mariniers Kazerne, unda un accidente serio a tuma luga. E accidente a sosode un caminda unda den

pasado accidente(nan) fatal a yega di tuma luga.

Na yegada di polis nan a bin topa cu tres vehiculo. Tawata trata di Toyota Yaris, un v-car Chevrolet Sonic y un auto marca Volkswagen.

Dos persona a resulta herida; ambos ta hende muhe.

Un herida tawata den e Yaris y e otro den e Volkswagen.

Na yegada di Polis di Trafico agentenan cu a yega prome a splica nan colega di trafico local a sosode.

Despues di esey chauffeur di e v-car cu ta un cabayero Hulandes a wordo acerca



door di polis; unda cu algun rato despues di scucha su version polis usa e Alco-Sensor.

E resultado tawata cu e la surpasa e limite di alcohol stipula pa ley, y eynan mes e la wordo deteni.

Transportwagen a wordo pidi pa buske y hib'e warda di San Nicolas.

Pa local ta e heridonan, dos ambulance a presenta y

un Rapidresponder, esnan herida a wordo transporta pa Hospitaal.

Caminda a permanece cera pa basta rato; unda cu Takelwagen cu a yega mester a move e autonan y e auto cu a ocasiona e accidente aki cu ta e Chevrolet Sonic blauw a wordo hiba warda di Santa Cruz pa mas investigacion.

Minister Endy Croes:

PA DI TRES AÑA CONSECUTIVO MINISTERIO DI DEPORTE TA SOSTENE BASEBALL IN PARADISE

Cu ta tuma luga di 9 pa 14 di october na Aruba.

: Diaranson atardi, durante Conferencia di Prensa a lansa e di tres (3) edicion di Baseball in Paradise organisa pa Future Star Baseball Academy. E campeonato di Baseball in Paradise ta tuma luga di 9 pa 14 di october den diferente stadion di Aruba. Alrededor di 700 hungado y 38 ekipo di, entre otro, Boneiro, Curaçao, Hulanda, Mexico y Aruba ta batayando den e tremendo campeonato aki. Un total di 130 wega ta wordo hunga den e siman aki den e siguiente categorianan: U12, U14,

U16 y U19.

Minister Endy Croes tabata presente na e lansamento di Baseball in Paradise unda el a enfatisa cu e vision di Gobierno di Aruba ta pa promove 'sport tourism' y esaki ta un forma na unda cu organisadonan mes ta bin cu e iniciativa pa organisa un campeonato di e magnitud aki y ta trece riba 450 persona entre hungado, mayor y nan famia Aruba. Durante nan estadia na Aruba, nan ta hospeda na hotel, huur auto y bishita diferente

sitio rond di Aruba y esaki ta duna contribucion na e vision di Gabinete Wever – Croes II. Minister Endy Croes ta gradici Aruba Tourism Authority (ATA) pa duna sosten y aporte. Como tambe e mandatrio ta gradici FFD cu a traha hopi di cerca cu Future Star Baseball Academy cu a duna nan aporte enorme na tur e veldnan cu nan ta maneha. Mandatario di Deporte ta gradici e organisacion di Future Star Baseball Academy tanto na Hulanda como na Aruba.

Concluyendo, Minister



Endy Croes ta invita henter e pueblo di Aruba pa e gran apertura di tres edicion di Baseball in Paradise cu ta tuma luga dialuna, 9 di october pa 6 or di atardi na Joe Laveist Sportpark na San Nicolas. Ban duna

apoyo y sosten na nos hobennan durante e siman aki. Masha pabien na e organizado y hopi exito na e hobennan! Cu deseo, disciplina, dedicacion y determinacion ta logra.

Wardacosta tin un Director Suplente nobo



Wardacosta pa Reino Hulandes den Caribe for di 2 di oktober ultimo tin un Director Suplente nobo, señora Joëlle De Jong-Mercelina. E Director Suplente nobo ta bira responsabel pa ejecucion di tareanan di Wardacosta y ejecucion di e maneho interno di Wardacosta, cu esaki e tin pues e guia diario den e organizacion.

Señora de Jong-Mercelina ta apto pa e funcion aki, danki na su carera impresionante entre otro na Ministerio di Hustisia na Corsou na unda su ultimo funcion tawata Secretario General Suplente. Su conosementu amplio di mantencion di ley, aplicacion di ley internacional, ley marítimo y tambe su 'background' di relacionnan exterior por keda aplica na Wardacosta.

Banda di esaki e tawata miembro suplente

di e 'Presidium' di e 'Kustwachtcommissie' di Wardacosta na nomber di Corsow y e tin experiencia como ex docente di Derecho Publico Internacional na Universidat di Antia Hulandes/Corsou. E ta tambe un ex miembro di VKC 'Vrijwilligerskorps' di Antia Hulandes. Joëlle lo ta e prome dama cu lo fungi den e funcion aki di Director Suplente di Wardacosta (PDKW). Wardacosta ta yama Joëlle De Jong-Mercelina bon bini na e organizacion y ta desea e hopi excito.=



Hulanda no por splica dicon mester un rijkswet; semper nan tin grip



Te cu awe Hulanda no por splica na forma satisfactorio dicon nan ta exige un rijkswet pa supervision financiero di pais Aruba.

Tur nan splicacionnan treci dilanti, cu ta un hypotheek, ta carece di base y ta sin sentido di realidad.

Ta mas bien parce cu algun Hulandes na Den Haag sea ta terco, of tin gusto personal pa un rijkswet. Di legalidad of motibo hustificabel, no tin ningun! Segun Hulanda: Aruba por kibra acuerdo y tuma otro decision. Pues nan kier e Rijkswet pa asegura cu ora yega otro gobierno, pa nan no kibra acuerdo. Esaki te coy loco y estupides di mas grandi cu nos por a scucha.

No ta berdad! Hulanda tin suficiente grip riba cualke gobierno

E ponencia di Hulanda ta robes, pero 1000% y 2000% robes.

Actualmente nan tin tur grip di supervision

financiero: Nan tin:

- Gobernador; gobernador por firma of keda sin firma begroting. El'a pasa na 2014 ora a duna Mike Eman un KB. No tabatin rijkswet

- Na 2015, Aruba y Hulanda a firma pa LAFT, cual ta encera supervision di CAFT. Den e LAFT ta poni esplicamente cu Aruba no por cambia LAFT sin autorisacion di Hulanda.

Si Aruba no por cambia e LAFT sin autorisacion di Hulanda, kemen cu ningun Gobierno por bandona cualke acuerdo di LAFT!

Pues e deseo di rijkswet ta un ambicion draconico contra Aruba.

Aruba ta cumpliendo cabalmente cu supervision Tur cifras di Aruba ta na ordo. Hulanda no por bisa cu e rijkswet ta pasobra cu Aruba no ta cumpliendo. Esey ta e pensamiento den Tweedekamer, cu kisas algun Hulandes ta hiba redashi y e pobercitonan

cu no sa mihor, cu no ta aplica wederhoor, ta kere ciegame y saca conclusion robes.

Conclusion ta cu te cu awe Hulanda no a splica, dicon un rijkswet, of mihor bisa ki te grip cu nan lo haya, di loke nan no tin awor

No ta keda nos nada otro pa pensa cu ainda e mentalidad colonial, e mentalidad di esclavo keto bay ta core den e DNA y e venanan di ambtenaarnan Hulandes, unda por saca un conclusion: e rijkswet ta pa otro motibo! Pa sacia nan sed di colonialismo. Nan no por laat los!

Y e hasimento di negoshi riba lomba di Aruba, ta sigui! Hulanda tambe por "doe het voor de kinderen", pero ta riba lomba di e kinderen di Aruba nan kier gana 300 miyon florin di intrest. Esey ta cambia e ora "doe het voor Nederland"!

CEDE ARUBA y UNIVERSIDAD DI ARUBA ta establece un colaboracion importante

CEDE ARUBA, nos organisacion local cu ta dedica na desaroyo social y sostenibel a firma un Memorandum di Entendimiento (MoU) cu UNIVERSIDAD DI ARUBA. E meta principal di e acuerdo aki ta pa drenta den un colaboracion den e area di educacion y desaroyo comunitario.

Pa mas di 40 aña, CEDE ARUBA a duna sosten na diferente NGO's di Aruba y na e sector di sociedad civil y boluntarismo. CEDE ARUBA tin como meta principa na contribui na un comunidad unda hende di tur edad y conocimiento por sigui desaroya nan mes. E cinco strategianan di CEDE ARUBA ta inclui financiamiento, desaroyo di capacidad, networking, abogacia, y desaroyo y implementacion di programa/proyecto. A base di un dialogo amplio den e area di NGO's, CEDE ARUBA a crea un Compass Strategico pa 2022-2026.

UNIVERSIDAD DI

ARUBA ta brinda oportunidadnan di educacion mas halto na Aruba pa 35 aña y a contribui den formacion educacional di profesional. E resultado ta unda nos tin awendia profesionalnan cu ta tene posiconnan clave den e economia di Aruba. Actualmente, UNIVERSIDAD DI ARUBA ta ofrece 7 area principal di estudio, como tambe un base academico, un guia pa studiantenan cu a gradua recientemente for di scol secundario y ta ekipanan cu hermentnan y abilidadnan pa sobresali den e nivelnan halto academico y asina nan por descubri nan vocacion.

E colaboracion proponi ta basa riba e prioridadnan strategico delinea den e Compass Strategico di CEDE ARUBA 2022-2026. E prioridadnan aki ta inclui un aporte na institucionnan stabil, coleccion di data y informacion, programanan den bario, y e desaroyo di un Visitor



Charity Program. E colaboracion primordial ta pa provee recursonan di conocimiento, manera stagiaires, estudiante y investigacion saliendo for di Universidad di Aruba. Adicionalmente, CEDE ARUBA lo facilita y contribui na duna oportunidad y experiencia practico na studiantenan, tambe ta duna financiamiento na programanan y entrenamiento di Universidad di Aruba y e Instituto di Bon Gobernacion y Liderazgo, esaki di acuerdo cu e areanan specifico indica den e MoU.

Un otro parti di e

fundeshi pa e acuerdo aki a wordo traha durante e tayernan interactivo "Towards integrity in Aruba", organisa pa UNIVERSIDAD DI ARUBA/Aruba Institute for Good Governance and Leadership den colaboracion cu Stichting Deugdelijk Bestuur Aruba, Saxion Hogeschool, y Hope Aruba. E prome recomendacion den e raport di National Integrity System (NIS) ta indica cu no tin un 'solucion rapido' pa cambia un sistema di integridad nacional di un dia pa otro. Sinembargo, cualkier pasonan chikito den direccion di re-enforsa un NIS, ta re-enforsa otro pilar. E aporte

y recomendacionnan presenta durante e tayernan aki a inspira CEDE ARUBA y UNIVERSIDAD DI ARUBA pa tuma pasonan concreto pa combina forsa den interes di futuro di Aruba.

E acuerdo ta pa un periodo di cuater aña. E colaboracion aki lo stimula un relacion fructifero entre CEDE ARUBA y UNIVERSIDAD DI ARUBA, den e meta final di haci un aporte sostenibel na NGO-nan local, sociedad civil y e sociedad Arubano en general.

Coriente a bay na Papilon pasobra un truck a slip ranca un palo di lus completo

Diaranson mainta a drenta informe di un accidente banda di Arubaanse Wegenbouw na Santa Martha, mesora a dirigi un patruya na e sitio. Na yegada di e patruya a bin compronde cu aki ta trata di un truck grandi cu a slip den e bocht riba e caminda muha y a bay ranca un palo di lus completo. Esaki a causa cu coriente a bay den e area rond eybanda. Afortunadamente ningun hende a resulta herida.



FOODSTOCK

STREET FOOD FESTIVAL & BLOCK PARTY FOR CHARITY



FOOD MUSIC FUN

STREETFOOD

CHICHI'S BBQ
PORK-NO GRAPHXXX
ISSABEACH
DELI DELI
JOHNNY'S CAKES
& SHAKES
T2PAN

TROPICAL
BOTTLING BAR
CHORIPAN EL PIPE

DESSERTS

POFFERTJES BY
POFFERDORIE
THE SWEET SPOT ARUBA

MUSIC

DJ YEIMY
BAMBU BAND
DJ SKY

FUN

GAMES
BY ROTARACT
DINO JUMP
LOTS
OF SURPRISES

CMB
MAIN
BRANCH

OCT.
14, 2023

TIME
6:30 PM TO
9:30 PM

SPECIAL
ANNOUNCEMENT
FOR ALL CMB
CUSTOMERS



Entrada
Afl. 15.00

Entrada ta inclui 2 item na e Street Food tent di bo gusto, 1 item di dessert y 2 bebida (soft drink of cerbes) cortesia di Tropical Bottling Company.



TUR FONDO RECAUDA LO BAI NA BENEFICIO DI VICTIMANAN DI VIOLENCIA RELACIONAL

Prome Minister Evelyn Wever-Croes: Den e reunion organisa pa SIDS durante e Asamblea General di Nacionnan Uni **PROME MINISTER A SPLICA DI E AVANSENAN DI ARUBA RIBA E EARLY WARNING SYSTEM**

“Otro aña e Sistema lo ta operacional y Aruba ta bira un pionero y un role model pa otro paisnan den Caribe”

- Durante e siman e reunionnan di Asamblea General di Nacionnan Uni #UNGA78 na New York, Prome Minister Evelyn Wever-Croes a atende diferente conferencia, high level events, y reunionnan riba diferente topico relevante pa Aruba. Un reunion hopi importante cu Prome Minister a atende tawata tocante e Early Warning System. E encuentro aki a wordo organisa pa Small Island Development States (SIDS).

Nacionnan Uni ya pa hopi tempo ta encurasha y pone enfasis riba islanan chikito manera Aruba pa pone sistemanan di alerta y aviso tempran pa comunidadnan. Den e conferencia aki, Premier di Sint Maarten, Silveira Jacobs y Premier di Aruba a hiba palabra y Prome Minister a duna

informacion elabora riba e avansenan di Aruba riba e Early Warning System. Bureau Rampenbestrijding, (BRA), ta trahando riba esaki y Aruba a haya fondo aloca pa implementacion di esaki y na maart 2024 e sistema aki lo ta operacional. Stakeholders tambe ya ta envolvi den esaki.

BRA pa hopi tempo a expresa e deseo pa Aruba tin e sistema Early Warning System, cu lo yuda anticipa riba calamidadnan mas tanto posibel. E sistema científico aki ta analisa fenomenonan pa asina yega na conclusionnan y duna avisonan trempan di calamidadnan na caminda. E importancia di esaki ta cu e avisonan aki ta yega tur caminda por lo tanto e avisonan lo mester bin den tur idioma y forma posibel na Aruba, te hasta ora un



persona ta den mondi, y no tin accesibilidad na comunicacion, e tambe por haya e informacion aki. E sistema ta un guia tambe pa haci e proceso di evacuacion mas facil of pa tuma medidanan di precaucion. E meta ta pa tin mas siguridad y scapa bida di hende y minimalisa e dañonan pa asina haya e forsa pa recupera bek. Esfuersonan ta wordo haci pa logra un Aruba mas resiliente contra cualkier

calamidad. Awo, cu a logra fondonan di Union Europeo, esaki ta bira realidad.

Union Europeo ta financia 1.7 miyon Euro pa e Proyecto Early Warning System. Cu esaki, Aruba ta bira un pionero den Caribe, un role model pa otro paisnan den Caribe. Nacionnan Uni ya a stipula cu dentro di 5 aña tur pais den Caribe mester tin un Sistema asina y Aruba

ta canando adelanta den esaki mientras cu hopi pais den region ainda no tin e sistema aki.

“Aruba ta avansando y pa otro aña tin e Sistema aki ta completamente operacional y pa despues sigui profesionalisa den esaki. Ta importante pa islanan chikito haya avisonan tempran y ta miho prepara pa scapa tanto bida di hende como posicionnan material”, Prome Minister a expresa

Cambia perspectiva tocante obesidad: Sa bo number y midi bo peso



Aruba ta anfitrión di e Cartagena Convention diana 3 pa 5 di october 2023

A toca Aruba e gran honor di ta e anfitrión di e conferencia di Cartagena Convention cu ta tuma luga diana 3 pa 5 di october 2023. Esaki ta e di 20 edicion di e reunion intergubernamental pa e plan di accion pa e programa ambiental di Caribe (IGM20). Durante e mesun periodo aki ta tuma luga e di 17 Conferencia di Partidonan na e Convenio pa e proteccion y desaroyo di e medio ambiente marino di e region di Caribe (COP17). Directie Natuur en Milieu (DNM) tambe lo forma parti di e conferencia di e Convenio di Cartagena.

E evento aki ta e reunion ambiental mas importante di Caribe unda representantenan di gobierno y organisacionnan no gubernamental ta bini hunto pa elabora riba e retonan ambiental y establece solucionnan pa e region di Caribe den su totalidad.

Di e Programa di Medio Ambiente di Nacionnan Uni (UNEP) a bin establece e Programa di Medio Ambiente di Caribe (CEP) na 1981. E programa ta special pa e 'Wider Caribbean Region (WCR)', pues e region di Caribe den su totalidad. Door di e programa aki, ta reconoce e importancia, balor, fragilidad y vulnerabilidad di e ecosistema di e lama den region Caribense, WCR. Den e programa tambe a inclui bestia y mata endemico den e region. Despues cu e paisnan den e region a tuma over e Plan di Accion na 1981 cu a conduci na e desaroyonan positivo, a bin establece e Convenio di Cartagena dia 24 di maart 1983.

E Convenio di Cartagena ta e prome y unico tratado regional obligatorio di su categoria. E convenio ta promove e proteccion y desaroyo di e medio ambiente marino. E Convenio di Cartagena ta ratifica pa 26 pais, miembro di Nacionnan Uni den region di Caribe. E areanan cu e convenio

ta cubri ta: e Golfo di Mexico, Mar Caribe y e areanan di e Oceano Atlantico cu ta cerca di e region Caribense.

Kico ta e Convenio di Cartagena? E Convenio pa e Proteccion y Desaroyo di e Medio Ambiente Marino di e WCR (Wider Caribbean Region) conoci como e Convenio di Cartagena, ta un acuerdo legal regional pa e proteccion di e Mar Caribe.

E Convenio cu a tuma over na Cartagena, Colombia riba dia 24 di maart 1983 a drenta na vigor dia 11 di october 1986. E Convenio ta sosteni pa tres acuerdo tecnico di Protocolnan riba Derame di Petroleo, Areanan di Naturalesa Protegi cu ta e protocol concerning Specially Protected Areas and Wildlife (SPA) y protocol tocante fuentenan di contaminacion cu ta un efecto secundario procedente di actividadnan riba tera cu ta drenta lama – protocol concerning Pollution from Land-Based Sources and Activities (LBS).

A tuma over e Protocol di SPAW den Region di Caribe, riba 18 di januari 1990 y a drenta na vigor dia 18 di juni 2000. E Protocol SPAW ta representa e unico acuerdo regional cu ta legalmente obligatorio pa e proteccion y uzo sostenibel di biodiversidad di costanan y vida marino den e Region di Caribe, WCR.

E Protocol LBS cu a tuma over riba dia 6 di october 1999 a tuma lugar na Aruba e tempo ey, y a bay na vigor dia 13 di augustus 2010. Un total di 15 partido cu a yega na un contract. Esaki ta e unico instrumento of acuerdo regional cu ta obliga e paisnan den e Region di Caribe pa pone atencion na y atende e topico di contaminacion marino for di e fuente di actividad. Kico e Convenio di Cartagena ta enfoca riba dje?

E Convenio ta cubri mayoria aspecto di contaminacion marino



pa cu e partidonan cu ta den e acuerdo y tambe tur locual mester tuma over manera medidanan specifico. E medidanan aki ta inclui prevencion, reducion y/of control di:

- contaminacion di barconan
- contaminacion causa pa dumping
- contaminacion di actividadnan den fondo di lama
- contaminacion di aire
- contaminacion causa pa actividadnan riba tera

Paisnan cu ta di acuerdo y ta participante na e Convenio tambe, mester:

- proteha y preserva ecosistemanan y e habitatnan fragil di espcienan cu ta cabando, birando mas tiki den cantidad, bou menasa of ta na peliger.
- desaroya plannan tecnico y evaluacion di impacto ambiental di proyectonan di desaroyo.

E Convenio di Cartagena ta traha pa sostene otro convenionan, acuerdonan y compromisonan ambiental global tambe. E conferencia ta un oportunidad importante pa e paisnan di Caribe comparti miho practicanan, desaroya alianzanan, y compromete na actua of tuma accion pa proteha e medio ambiente marino.

Durante e conferencia lo reuni tambe cu stakeholdernan clave di tur e region pa discuti y atende cu/of enfrenta e retonan ambiental importante pa e region di Caribe.

E Conferencia di e Convenio di Cartagena ta un oportunidad unico pa Aruba profila su mes y demostra compromiso pa cu proteccion ambiental y desaroyo sostenibel. E conferencia tambe ta un oportunidad pa Aruba fortalece su relacion cu otro paisnan di Caribe y pa traha hunto pa crea un futuro mas resiliente y sostenibel pa e region.

Segun e expectativa, e conferencia ta genera beneficio economico pa Aruba, pasobra e ta atrae bishitantenan di rond mundo, specialmente esunnan den Caribe. E conferencia lo duna tambe oportunidad pa negoshinan Arubano demostra nan producto y servicio na un audiencia cu internacional.

Ta invita e publico pa involvi su mes den e Conferencia di e Convenio di Cartagena door sigui e topiconan di conferencia. E organisadonan di e conferencia lo comparti informacion actual di e conferencia riba e website www.unep.org/cep

IGM20/COP17 | The Caribbean Environment Programme (CEP) (unep.org)

MINISTER ENDY CROES TA FELICITA E STUDIANTENAN DI BAY UNIVERSITY SCHOOL OF MEDICINE CU A RICIBI NAN WHITE COAT Y CINCO STUDIANTE CU A RICIBI NAN MD DEGREE



: Recientemente, Presidente di Parlamento mr. Edgard Vrolijk a representa Minister di Enseñansa y Deporte Endy Croes na Ceremonia di White Coat y Ceremonia di Graduacion di Bay University School of Medicine na Hyatt Place Aruba Airport. Durante e ocasion special aki, Presidente di Parlamento mr. Edgard Vrolijk a duna un discurso, felicitando e studiantenan nobo cu ta bay ricibi nan "white coat" y e cinco (5) graduadonan

cu a ricibi nan "Medical Doctor Degree".

Minister Endy Croes ta gradici henter e team di Bay University School of Medicine cu contribui den e desaroyo profesional y personal di e graduadonan. Pa finalisa, Minister Endy Croes ta felicita e graduadonan cu a ricibi nan MD degree, alabes ta felicita tur e estudiante cu a ricibi nan "white coat" y ta desea nan exito den nan estudio na Bay University School of Medicine.



Programa di beneficio pa empleado HOH SUN SHARES ta un realidad HOH un organisacion prominente y ehempel pa otro den nos comunidad

Horacio Oduber Hospital como un di e organisacionnan di mas grandi riba nos isla di no menos di 1100 empleado tin como enfoka pa cuida pashent y cliente, pero tambe cuida nos empleadonan y medio ambiente. Tambe teniendo na cuenta cu un di e fundacionnan di HOH ta pa ta financieramente sostenibel, recientemente a firma un MOU (Memorandum of Understanding) cu e compania local B-Energy pa ofrece panel solar como beneficio na nos empleadonan.

Un momento sumamente grandi unda finalmente a introduci e programa pa empleado yama HOH SUN SHARES.

Algun luna pasa a saca un encuesta interno pa midi e interes bou di empleadonan den loke ta

adkiri panel solar pa nan cas. Debi na e tremendo reaccionan ricibi, team di maneho a cuminsa negosha cu diferente companianan local cu ta ofrece panelnan solar. Y finalmente a scohe e compania cu a bin cu e miho oferta pa HOH y su empleadonan cu a resulta den e compania local B-Energy.

Un momento sumamente importante y alabes grandi mirando cu e ta posiciona HOH como un dunado di trabou cu ta ehempel pa hopi eyfo mirando cu banda di ofrece un beneficio na un miho prijs y interes abou HOH ta cuida medio ambiente tambe. Recientemente Hunta di Directiva di HOH a soprende e team completo di HOH cu e tremendo noticia aki cual tin hopi tempo ta traha riba dje pa hasi'e un realidad.

Awo tur colega na HOH



cu ta interesa di tin nan propio panelnan solar na cas lo por haya esaki danki na nan dunado di trabou na un miho prijs y cu interes mas abou cu e programa interno HOH SUN SHARES.

E fuente di energia renobabel aki lo spaar coleganan energia, reduci cuenta di electricidad, e ta

bon pa medio ambiente y ta aumenta e balor di e cas.

Awo cu HOH a firma e acuerdo aki cu e compania local B-Energy lo start cu sesionnan di informacion den luna di oktober pa asina presenta kico e programa aki ta encera pa tur empleadonan.

Hunta di Directiva di

Hospital hunto cu team di maneho ta sumamente orguyoso di e paso aki cu a tuma pa añadi mas beneficio pa nos empleadonan haciendo HOH un compania profesional cu ta cuida pashent y cliente, pero tambe ta cuida nos empleadonan y medio ambiente.

Chauffeur a reacciona laat y a bay dal tras di scooter para pa bora na man robes!

Diamars anochi a drenta informe di un accidente cu hende herida na e crusada banda di Ruiz Take Away na Tanki Leendert, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un accidente entre un auto y un scooter unda e chauffeur di e auto debi na e yobida y e caminda muha a ripara mucho laat cu tin un scooter su dilanti para memey caminda pa bira na man robes y pa ora e a brake e auto a slip sigui bay dal e scooter mientras e motociclista a bula for di e scooter prome cu e impacto. Esaki a causa cu e motociclista a haya algun golpi y raspa na su curpa. Na yegada di e ambulans e motociclista mes a cana bay den e ambulans, e paramediconan a atende y a transporte pa hospital.



Accidente entre Taxi y un Toyota Yaris



E accidente tawata entre un taxi y un Toyota Yaris.

Locual a sosode tawata cu e taxi lo a subi e crusada cu ta scur y for di su man robes e Yaris tawata biniendo.

E Yaris segun comentario di un otro taxista na e sitio; cu e lo no tawata tin su luznan di auto cendi.

E impacto tawata den e tire di e taxi un Buick parti drechi patras; esaki a causa cu e taxi a spin y para cara pabou bek.

Despues di e impacto e Yaris cu aparentemente no por a para, a sigui core bay zuid casi 100 meter y despues a baha pabou di caminda.

Por a mira despues cu e Yaris a kibra completamente parti dilanti.

Patruya di Strandpolitie a yega y un rato despues patruya di trafico.

Den e taxi tawata tin dos señora turista di edad, cu



tawata spanta y na e momento eynan e señora no por a describi si e tawata herida.

Asina mes autoridad a pidi

pa un ambulance pa presenta y controla e dama. Takelwagen na final a kita e taxi cu tawata memey di caminda.



Diamars anochi den careda di 9'or y mey a sosode un boksmento ariba e cru-

sada parti paden pazuid di Eagle Resort & Casino.

Polis investigando caso di intento di asesinato banda di hotelnan highrise



Recientemente a sosode un caso di intento di asesinato banda di e hotelnan

highrise unda cu un persona a manda un projectil basta grandi y duro riba e

vehiculo di un taxista. E obheto aki a bay dal riba e frontgrill di e Prado cual a



haci hopi daño na e vehiculo di tal forma cu e taxi no por sigi core y mester

a busca un takelwagen pa hiba e auto na garashi pa reparacion.

Minister Ursell Arends:

Conferencianan di Convenio di Cartagena tumando luga na Aruba e siman aki



ORANJESTAD - E siman aki Aruba lo ta e anfitrión di 19 Conference of Parties (COP) di e Convencion di Cartagena pa e Proteccion y e Desaroyo di e Medio Ambiente Marino den e Region di Caribe.

E Convencion di Cartagena ta un tratado internacional cu ta destina pa protege y preserva e medio ambiente marino y costal den e region di Caribe. E tratado aki a ser adopta na 1983 na Cartagena de Indias, Colombia.

E ta un di e convencionnan di lamanan regional desaroja bou di e auspicionan di e United Nations Environment Programme (UNEP).

E obhetivo principal di e Convencion di Cartagena ta preveni, reduci y controla e contaminacion di e medio ambiente marino den region di Caribe y promove e desaroyo sostenibel cu maneho di recursonan natural.

COP ta e entidad cu ta goberna e Convencion di Cartagena. E ta reuni periodicamente pa controla e implementacion di e

convencion, tuma decision ariba su funcionamiento continuo y adopta medida pa aborda problemanan ambiental emergente den e region.

Pues e Convencion di Cartagena ta abarca un area geografico amplio, cu ta inclui e awanan costal di 28 pais y teritorionan di Caribe, cu ta extende di e Golfo di Mexico y Caribe te e Atlantico tropical.

E convencion aki tin varios protocol cu ta aborda preocupacionnan ambiental specifico den e region. Un di e protocolnan mas conoci ta e Protocol Concerning Specially Protected Areas and Wildlife (SPA Protocol), cu ta enfoca ariba e conservacion y maneho di biodiversidad y areanan proteha.

COP 19, conoci tambe como e '19th Conference of the Parties to the Cartagena Convention', ta un di e reunionnan periodico celebra pa e miembronan di e convencion.

E conferencianan aki ta brinda un plataforma na e paisnan miembro pa discuti y coordina esfuerson-

an pa aborda problemanan ambiental marino, incluyendo contaminacion, e conservacion di habitatnan y e maneho sostenibel di pesca.

E conferencianan aki ta esencial pa mantene e cooperacion entre e paisnan di Caribe y pa avansa e obhetivonan di e Convencion di Cartagena den e proteccion y desaroyo di e medio ambiente marino y recursonan costal di e region.

Minister Arends ta orguy-



oso di por participa como Pais y tambe honra di por presidencia e conferencianan aki como reino.

Aruba seguramente ta keda dispuesto pa aporta na nos bienestar di medio ambiente den Caribe.

Chauffeur di pick-up a slip riba caminda muha perde control dal cura kibra sigui core pero no a yega leu



Diamars anochi a drenta informe di un accidente na Mahuma, mesora a dirigi un patruya na e sitio. Na yegada di e patruya a bin compronde cu un pick-up lo a slip riba e caminda muha, perde control y bay dal e cura kibra. Polis a haya e cura di waya di un cas destrui pero e vehiculo mes no tabata tey pasobra e chauffeur a purba bay pero debi na daño na e wiel e no a logra yega leu. Polis a nota cu e chauffeur tabata tin un corta na su nek y a



pidi ambulans pa e victima. Na yegada di e ambulans nan a atende e victima.

Aruba su teamnan ta cla pa Best of the Best



Taekwondo Team Aruba ta contento di por mira un desaroyo grandi den tur e atletanan cu ta forma parti di Taekwondo Team Aruba.

E atletanan ta train hopi duro pa enfrenta e paisnan Internacional cu ta yega Aruba entrante mañan pa Best of the Best Truescore Aruba 2023.



E inventor di e sistema electronico Jin Song a yega Aruba caba cu e headgear electronico cu lo wordo usa pa prome biaha

na Mundo den e campeonato di Best of the Best Truescore Aruba 2023.

Na aña 2010 a lansa e

headgear electronico pa prome biaha na Aruba y awo despues di 13 aña e headgear electronico nobo di Generation 3.



Master Yoshmar Wever y Master Clifford Rasmijn di



5	3			7				
6			1	9	5			
	9	8					6	
8				6				3
4			8		3			1
7				2				6
	6					2	8	
			4	1	9			5
				8			7	9



Clasificados

SOLODIPUEBLO@GMAIL.COM
CEL. 585 9500

J'ACCUSE: E COMPRA DI E INCINERATOR FOR DI SPONSOR TA CORUPCION DI DIA CLA!!

Despues di hopi tempo di tabata keto, mi amor patrio ta pone mi cu mi tin di reacciona riba gañamento di un director di DOW cu parce ni berguenza e tin. Cu cara di palo mescos Pontius Pilato ta draai riba e stoel y ta scupi mentira tras di mentira. E sa cu eta sinta riba "hete kolen" y e sa cu lo tin hende cu por refuta delaster un di su mentiranan. No ta pornada mi a inclui su persona den mi denuncia penal contra e Santito "corbarde" Corupto Otmar! Otmar a reta tur hende cu ta trata di dañu su number y mi a acepta e reto y a yamé un CORUPTO na varios ocasión. Te awe mi ta sperando un "oproep" pa un caso den corte. E por a bolbe "get away with crime" cu ayudo di su amigo ex-PG, pero dilanti huez mi lo prueba pakico mi conclusion ta cu e compra di e incinerator ta un acto corrupto. Compra di un PORKERIA cu al final nos pueblo ta bai paga pe. Pa colmo awor e director kier hustifica compra di un otro PORKERIA, siendo cu e sa desde cuminsamento cu esaki ta e caso, mirando cu e mes a pone esaki den un carta, cu ta trata e uso "restfonds" di FDA pa drecha planta di RWZI na Bubali urgentemente, mirando e peliger di e planta aki. Ta parce cu e director di DOW ta purba di na prome lugar scapa peyeho di dje,

di e Ex-minister corrupto, full e gobierno anterior y esun actual. Y pa colmo e ta hustificando compra di un otro incinerator cu NUNCA a cumpli.

E racha di corrupcion a cuminsa ora mayoria di esnan cu por a participa na destaho pa incinerator a pidi pa cancela henter e procedura. E director ni e ex-minister no a ni hiek, conforme reglanan di Good Governance y di destaho publico, pa para esaki.

Asina e ta papia di REDUNDANCY di e aparato! E sponsor mes di Ex-minister a bisa den un reunion, y esaki ta documenta den e notulanan, cu nan(CTC) NO tin esey y nan no mester di esey tampoco! Pero na e momentonan aki e incinerator NO por kima! Esaki SO mester ta un motivo pa DESCUALIFICA loke e sponsor ta ofrece, mirando cu e no a cumpli cu e bestek. Den un carta cu e director MES a manda pa e Ex-minister corrupto, e ta bisa cu e aspecto di REDUNDANCY ta indispensable y "maatgevend" den e proceso aki! Dicon "donder" bo mes a sostene e Ex-minister corrupto pa cumpra e incinerator porkeria aki toch anto? Miedo? Of e ta complice?

Den e MB ta poní hopi cla cu e incinerator mester por "verwerk" 15-20 ton diariamente y no manera e director a bisa durante e

conferencia di prensa!! Si e incinerator ta cumpli cu loke a acorda, facilmente e aparato mester por cumpli cu e demanda actual! Y obviamente awor NO mester bai over na cumpra un otro PORKERIA!

Pues e incinerator ta un "MISKOOP"! Y e director sa esey, pero kier purba di scapa cara di su mes y di e ex-minister Otmar door di malinforma y manipula cu cifranan INCORECTO!

Segun informacion ricibi ta cu te september 2023 e cantidad cu a yega dump ta leeuw di loke e director a trece padilanti durante e rueda di prensa. Pa loke ta trata "medisch afval" esaki te september 2023 ta 358 ton. Sinembargo den e desperdicio di e.o. hospital ta bin mas cos cu "medisch afval" y esaki pa falta di un miho control kico ta drenta. Asina mes esaki ta mucho mas abou di loke e bestek ta bisa. E cifra pa cadavernan ta hopi mas abow cu a ser acorda. Te cu september ta 78 ton di cadavernan, inclusivo loke ta bin for di abattoir. E cifra acorda ta 250 ton pa aña!!

Loke cu a corona obra ta e cantidad di ton di "sludge" cu a yega dump pa kima den e incinerator. Te cu september esaki ta 579 ton. Esaki ta nifica unicamente 3 ton pa dia ta ser kima den e incinerator, compara cu 10 pa 15 ton acorda pa dia!!

Awor ken e director kier purba di gaña of defende? E PORKERIA aki simplemente NO a cumpli!! Y for di un principio mi persona a bisa esaki, pero "nobody cared"! Y awor enbez di pone e sponsor responsabel pa esaki, kier recompense pa cumpra un of dos

di e porkerianan aki mas. Aparte cu e incinerator aki ta hopi mas caro cu e otro ofertanan, e incinerator aki no ta sirbi ni pa tira afo!!

Ban wak si awor si nos Parlamento ta lanta for di "winterslaap" y haci trabou di e corrupcion aki. Den e henter e procedura aki no solamente mester cuestiona e ex-minister Otmar pero tambe su coleganan minister cu ta complice den henter a bagamunderia aki sin kita afo e "eerste adviseur" di e ex-minister (cu awe ta man drechi di minister president) y last but not least e director di DOW, cu a hunga y obviamente ta sigui hunga un rol hopi prominente di complice den henter e asunto cuestionabel aki.

Un director cu semper a hiba un maneho sin pia sin cabez y tur esaki pa complace cu locuranan di e minister. Djis pa menciona algun: ta traha un raport contra un compania local, riba insistencia

di e ex-minister, bisando cu loke e compania local ta haci lo ta malo a sabien- das cu kimando e sludge usando pallet ta cumpli cu e normanan di EPA. Esaki djis pa complace cu Otmar.

Un otro prueba di mal maneho ta ora ta duna bouwvergunning sin existi pa inversionnan cuantioso ser haci den e RWZI-nan. Of ta traha 3 rotonde y no ta worry cu e plantanan di RWZI cu dia pa dia ta bira un peliger grandi y inminente pa nos turismo.

Y awe e director kier cuestiona otronan, pero ta su mesun maneho conduci cu awe e RWZI-NAN tin problema y e incinerator no ta funcionando!!

Por ultimo, dicon e director no ta publica e carta na unda e mes cu ta declara cu ta e ex-minister Otmar a obligue di acepta e PORKERIA aki? Asina por conclui cu e Director mester wak su mes den spiel y baha na awa asap!



“Señor ta mi wardador, mi’n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.
Salmo: 23

Cu inmenso dolor y tristeza na nos curason pero cu hopi gratitud
pa tur locual e la nifica pa nos, nos ta participa fayecimen-
to cristianamentedi nos ruman stima:

Myrlanda Rachelle Salazar

*03-10-1951 - †30-09-2023

Mayornan:

†Petra Salazar
†Nicolas Salazar



Como yiu stima:

Emanuel Salazar

Rumannan:

Ricci y †Leonardo Tromp
Ranulfo Salazar
Alba y †Percy Elizabeth
Elizabeth y †Pedro Perez
Haydee y Ronny Gomez
Jorge Salazar y Wendy Orman
†Roque Salazar y Thea Tromp
†Felicia Mercedes y Norman Dijkhoff
† José Salazar y Astrid Geerman
Aischell Salazar

Sobrino(a)nan:

Edmundo y Nathalie Tromp
†Acela, Tarsis, Miguel y Raquel Elizabeth,
Sandra, Javier y Rodrigo Perez,
Tamara Llanes-Gomez y Xiomara
Arends-Gomez,
Genevieve Salazar,
Brighton Dijkhoff,
Errol y Amber Salazar,
Stephanie, Kyra, Lyshah, Kiarah Salazar,
Sergio Jie Sam Foek

Ihanan:

Brighton Dijkhoff
Steve Thiel

Sobre sobrinonan, primo y primanan, ex-coleganan di RBC
Bank, ex-coleganan di Coro San Francisco, Bisiñanan y demas
famia na Venezuela y Colombia: Salazar, Tromp, Elizabeth, Per-
ez, Gomez, Dijkhoff, Rasmijn, Orman, Thiel, Llanes, Arends,
Geerman y Jie Sam Foek

Ta invitra pa e acto di entierro cual lo tuma lugar diahuebs 5 di
October 2023 saliendo for di misa Pro Catedral San Francisco
na Playa pa 4:00 pm. For di 2:00 pa 4:00 pm lo ricibi bishita di
condolencia y despues ta Sali pa Santana catolico na Playa.

Despues di entierro no por ricibi bishita di condolencia na cas.

Minister Ursell Arends:

Abo ta doño di mascota responsabel?

Oranjsetad - Awe ariba dia di
bestia nos kier haci e pregunta:
Abo ta un doño di mascota re-
sponsabel?

Bo ta na altura di nos Ley di Ca-
cho? Bo ta cuida e salud di bo
mascota? Bo a sterilisa y micro-
chip bo mascota? Bo cacho ta
den bo cura? Esakinan ta pre-
guntanan cardinal cu cada doño
di mascota responsabel lo con-
testa cu un SI!

Awe Ministerio di Transporte,
Integridad, Naturalesa y Asun-
tonan di Adulto Mayor hunto
cu Centro di Control di Cacho
ta lansa e campaña di conscien-
tizacion relaciona cu cuido re-
sponsabel di mascota. Durante e
campaña aki lo bay duna hopi in-
formacion ariba diferente topico
manera Ley di cacho, cuido di
salud di mascota, sterilisacion,
microchip, eutanasia y tambe in-
formacion di nos fundacionnan.
Esakinan ta informacion impor-
tante cu cada doño di mascota
responsabel mester ta na altura
di dje.

Durante ultimo añanan nos a
observa un crecimiento di canti-
dad di cacho y pushi ariba caya.
Esaki ta algo di lamenta paso e
causa di e problematica aki ta
doñonan di mascota irrespon-
sabel cu ta busca cacho y pushi
sin tin e manera pa cuidanan
pa despues bandona nan pa nan
cuenta ariba caya.

Cacho y pushi ta animalnan do-
mestico cu ta depende 100% di
nan doño y ora cu bo ta bando-
na nan, ta biba un bida cruel cu
hopi dolor y sufrimento. Ademas
cu nan ta sufri nan lo bay repro-
duci y esaki ta caminda nos ta
awe. Cu un problematica cu ta
afectando nos tur ariba e isla aki
y e ta importante pa nos realiza
cu un cambio di mentalidad so
nos por yega na un impacto posi-
tivo pa alivia e situacion cu nos
tin actual.

Na Aruba nos tin hopi funda-



cionnan cu ta haci e trabou pa
rescata animal riba caya tur
dia. Pero despues di hopi aña
di rescata animal di caya, awo
mayoria a yega nan capacidad
maximo. Esaki ta pone cu nan
no por yuda comunidad tur ora,
paso nan mes ta yena cu cacho
y pushi cu nan a rescata for di
caya. Locual cu impresionante ta
cu no obstante cu fundacionnan
ta yuda y rescata nos animalnan
di caya, nos hendenan local mes
no ta adopta frecuentemente for
di un fundacion. Como resul-
tado, tur fundacion ta keda cu
mayoria cacho of pushi cu nan
ta rescata. Consecuencia di esa-
ki nos ta wak cu recientemente
hopi fundacion a pone un stop
temporal pa tuma mas animal
bou di nan cuido.

Prome cu bo busca un cacho of
pushi haci bo mes e pregunta
aki: Ami ta un doño di mascota
responsabel? Mi por dun’e cum-
inda y awa limpi tur dia? Mi tin
un cura y cas cu e ta keda safe?
Mi por paga pa su cuido di salud
tur luna? Mi por paga pa steri-
lisa y microchip? Si bo contesta
ta un SI na e preguntanan aki e
ora bo ta un doño di mascota re-
sponsabel.

E problematica di sobre popu-
lacion di cacho y pushi ta gran-
di, pero hunto como comuni-
dad consciente nos por duna
nos mascotanan e bida cu nan
merece! Ban sea doño di mas-
cota responsabel.

Bishita www.amitaresponsabel.org
pa mas informacion!

Tur cos aki na mundo tin su ora y su tempo.
Ora pa nace y ora pa muri, Ora pa yora y ora pa hari.
Ora pa keda keto y ora pa papia. Ora pa stima y ora pa odia. Ora pa guerra y ora pa paz.

**Cu imenso tristeza na nos curason, pero cu hopi
gratitud pa tur locual el a significa pa nos, nos ta anuncia
fayecimento di:**

Gilbert François Dirksz

Mihor conoci como: "Gibby"

*16-03-1975 - †30-09-2023



Na number di su:

Casa:

Yiu stima:

Mayornan:

Rumannan:

†Ebby Dirksz

Sobrino:

Ruman di criansa:

Lindomar Kock Jr.

Suegro(a):

Omo y tantanan:

Francisca Dirksz

Jasmine Dirksz-Haseth

Jesseline Dirksz

Francisco y Maria Dirksz-Kock

Ryan y Keila Dirksz-Briceño y famia

Geraint Dirksz

Johnathan Koolman

†Eufracio y †Virginia Haseth-Geerman

Margarita Dirksz

Ida y Ahméd Soliman-Dirksz

Lorenzo y Elduvina Dirksz-Caléron y famia

Filomena Dirksz

Lucia Dirksz

Maria Dirksz y famia

†Hyacinto y Vera Kock y famia

†Anna y Theodoor Koolman y famia

Francisco y Aura Kock y famia

Macario y †Marucha Kock

†Maxima Kock y famia

†Toribio Kock y famia

Rosalía y Boy Eugenia y famia

Roberto y Filomena Haseth-Figaroa y famia

Horacio Haseth y famia

Ludwina y Felipe Suerte-Haseth y famia

Mena y Michel Wolff-Haseth y famia

Rudolph y Patricia Haseth-Giraldo y famia

David y Jelitza Haseth-Koolman y famia

Martin Kelly

Leo Koolman

Mena Dirksz

Mark

Swa y cuñanan:

Padrinonan:

Iha:

Primo y primanan

Mihor amigo:

Juancho Croes

Tur su coleganan di Parke Nacional Arikok, tur su ex-coleganan di AMC Unicon y Arvefa,
amigo y amiganan, comer y compernan, Bisiñanan y conocirnan

Famia: Dirksz, Haseth, Kock, Briceño, Koolman, Geerman, Soliman, Calderon, Eugenia, Figaroa,
Suerte, Wolff, Giraldo, Lopez, Curiel, Rivero, Angela

Ta invita pa acto di condolencia y entierro cu lo tuma lugar diabierna 6 di September 2023
di 2:00 pa 4:00 pm na misa Inmaculada Concepcion, despues lo sali pa Santana catolico na Sta. Cruz.

Nos sincero disculpa si den nos tristeza nos lo por a lubida un of otro famia of conocir.

Despues di entierro nos no ta ricibi bishita di condolencia na cas.

Gibby semper contento.

Gibby su deseo tawata pa compaña pa su ultimo lugar di sosiego bisti na blaww.

Shara Williams a gradua como Bachelor den Organization, Governance and Management (OGM)



ORANJESTAD - Dia 27 di september 2023, Shara Williams a defende su tesis exitosamente.

E titulo di Shara su tesis ta "Navigating The Aruban Social Assistance Program: A Study About Readaptation and Reintegration into The Aruban Labor Market." Shara a defende su tesis dilanti di e comision di graduacion cu tawata consisti di sra. Nurianne Arias, sra. Valerie Maduro y sra. Chanin Boekhoudt di 'Directie Sociale Zaken'. Ademas tabata presente decano di Facultad di Arte y Ciencia, dr. Mieke de Droog. Famia di Shara, docentenan di Universidad di Aruba y coleganan tambe tawata presente.

Shara a investiga con mayor soltero ta nabega e sistema di asistencia social esta 'bijstand' y con nan ta prepara nan mes pa reintegra den e mercado laboral di Aruba.

E participantenan di e investigacion ta mayor soltero cu ta actualmente ricibiendo bijstand y mayor cu a ricibi 'bijstand' y cu acualmente tin empleo. A base di resultado, por conclui cu mayor soltero tin reto pa drenta mercado laboral bek y ta desea di ta mihor prepara den area di conocimiento y habilidad pa reintegra den mercado laboral.

Un di e recomendacionnan duna na 'Directie Sociale Zaken' ta pa crea of adapta plan di desaroya plan di

asistencia personalisa pa e beneficiarionan a base di nan necesidadnan y circunstancianan personal.


Otro recomendacion ta pa Departamento di Progreso Laboral y Departamentu di Asunto Social uni y traha hunto cu instituto cu ta ofrece educacion y preparacion pa empleo. Ta recomienda pa coopera cu e dicho institutonan aki pa crea y guia e beneficiarionan pa haya acceso na curso pa desaroyo profesional y certificacion cu ta coresponde cu e expectativanan actual den mercado laboral.

Ta gradici e docentenan di e departamento di OGM y profesional cu a yuda of guia Shara como estudiante. Tambe ta gradici tur esnan na y pafo di Universidad di Aruba cu a contribui na un manera of otro na e acontecimiento aki.

Pa mas informacion tocante e estudio OGM, bishita e website di Universidad di Aruba na <http://www.ua.aw/ogm>, e pagina di Facebook @



UniversityofArubaOGM y ogm_ua.
e pagina di Instagram @



PRONOSTICO DI TEMPO

VALIDO TE DIAHUEBS 05 DI OCTOBER 2023, 18:00 ORA

TEMPO:
 AWE TARDI Y AWE NOCHI: PARCIALMENTE NUBLA Y GENERALMENTE SECO
 DEN MARDUGA Y MAYAN: PARCIALMENTE NUBLA CU UN AWACERO BREVE

**TEMPERATURA MAXIMO 33 GRADO CELSIUS
 TEMPERATURA MINIMO 27 GRADO CELSIUS
 INDICE DI CALOR (HEAT INDEX) DEN Y ROND DI ORANAN DI MERDIA: 34 PA 45 GRADO CELSIUS**

**UV INDEX: 12
 POTENCIAL DI AWACERO PA PROXIMO 24 ORA: 3 TE 10 MM; LOCALMENTE ESAKI POR TA DIFERENTE.**

**REGISTRACION DI TEMPERATURA (GRADO CELSIUS) Y
 AWACERO (MM) DEN ULTIMO 24 ORA (8'AM PA 8'AM):**

**AIRPORT : MAX 33 / MIN 24 / 19.6 MM
 WESTPUNT: MAX 33 / MIN 25 / 10.3 MM
 STA ROSA: MAX 33 / MIN 25 / 16.8 MM**

PRONOSTICO DI TEMPO PA PROXIMO 3 DIANAN:
 PARCIALMENTE NUBLA CU UN AWACERO BREVE.
 BIENTO LO TA FOR DI DIRECCION OOST Y MODERA TE POSIBLEMENTE BASTA FUERTE DEN RAFAGA.
 TEMPERATURA (GRADO CELSIUS)
 MAX / MIN LO TA: 34 / 28

**BO SANGER
TA SALBA
BIDA!**

☎ 587 0002

📱 StichtingBloedbankAruba

www.bloedbankaruba.aw

